



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK**

Broj: 02-49-2-2574/16.

Datum: 19.12.2016. godine

**OPĆINSKO VIJEĆE TEŠANJ**

**PREDMET: Informacija o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama.**

Socijalna zaštita je organizovana društvena djelatnost od javnog interesa u Federaciji, kantonu i općini i usmjerena je na osiguranje socijalne sigurnosti građana i njihovih porodica u stanju socijalne potrebe. Socijalna zaštita podrazumeva pravo koje može da ostvari pojedinac ili porodica kojima je neophodna društvena pomoć i podrška radi savladavanja socijalnih i životnih teškoća i stvaranja uslova za zadovoljenje osnovnih životnih potreba.

U Bosni i Hercegovini stanje socijalnih potreba je snažno prisutno u društvu i to je jedan dio problema, a drugi dio problema se odnosi na kompleksnost u organizaciji socijalne zaštite. Trenutno i općina i Kanton i Federacija BiH izdvajaju sredstva za ove namjene.

Kad je u pitanju općinski Budžet, iz njega se u cijelosti vrši finansiranje rada JU Centar za socijalni rad (iznos od 340.000,00 KM).

Socijalna zaštita kroz općinski Budžet se ostvaruje: putem Javne ustanove Centar za socijalni rad (tekući grantovi Budžeta općine u iznosu 269.000,00 KM), direktno putem organa uprave (tekući grantovi Budžeta općine u iznosu 317.000,00 KM), te sredstva ZE-DO kantona koja se realizuju kroz budžet općine (u iznosu od 390.000,00 KM) i putem udruženja građana (tekući grantovi Budžeta općine u iznosu 121.400,00 KM). U tekućoj budžetskoj godini će biti realizovano ukupno izdvajanje za ove namjene, u iznosu od 1.437.400,00 KM.

Informacija sadrži podatke o socijalnoj zaštiti kao osnovnoj djelatnosti JU Centar za socijalni rad Tešanj sa osnovnim i proširenim pravima iz socijalne zaštite, i dodatne vidove podrške socijalnoj zaštiti putem udruženja građana i putem organa uprave.

Socijalna zaštita na području općine Tešanj provodi se u skladu sa federalnim i kantonalim Zakonom o socijalnoj zaštiti, zaštiti civilnih žrtava rata i zaštiti porodica sa djecom i odlukom Budžeta općine Tešanj. Implementacija navedenih zakona spada u osnovnu djelatnost JU Centra za socijalni rad Tešanj.

Iz Budžeta općine Tešanj finansira se pravo na stalnu novčanu pomoć u iznosu od 40 %, a shodno navedenom zakonu, kao i proširena prava socijalne zaštite:

- 1.jednokratna novčana pomoć,
- 2.novčana pomoć za ogrev korisnicima stalne novčane pomoći,
- 3.jednokratna novčana pomoć za liječenje djece oboljele od specifičnih oboljenja,
- 4.jednokratna novčana pomoć majkama porodiljama trećeg, četvrtog i dalje djece kao stimulativna mjera
- 5.pomoć za školovanje siromašne djece koja pohađaju srednju školu, a prema utvrđenim kriterijima.

Na području općine Tešanj pravo na stalnu novčanu pomoć ostvarilo je 112 korisnika. Pravo na ovaj oblik zaštite ostvaruju osobe koje su nesposobne za rad, nemaju dovoljno prihoda za održavanje,

nemaju članove porodice koji su po Zakonu obavezni da ih izdržavaju ili ako ih imaju da nisu u mogućnosti da izvršavaju obaveze izdržavanja.

Druga materijalna pomoć (jednokratna, povremena) je pravo kojim se obezbjeđuje novčana intervencija za porodice i pojedince koji se nađu u stanju trenutne socijalne potrebe. Stanje trenutne socijalne potrebe naših građana dodatno otežavaju određene okolnosti kao što su česti slučajevi : bolest, liječenje van područja općine, sezonski troškovi, nabavke ogreva, udžbenika kao i plaćanje el.energije i komunalnih usluga. Jednokratnu i povremenu novčanu pomoć do 30.10.2016.godine koristilo je 981 osoba. U općinskom budžetu je definisana posebna stavka JNP za liječenje djece oboljele od specifičnih oboljenja a koja se realizuje putem CSR Tešanj uz saglasnost Općinskog Načelnika, a po zahtjevu roditelja i prijedloga Službe za boračko invalidsku zaštitu, općine Tešanj, ovu pomoć do 31.10.2016.godine koristilo je 25.teško oboljele djece.

U Federaciji Bosne i Hercegovine još uvijek ne postoji odgovarajuća zakonska regulativa po pitanju dnevnih centara za pružanje usluga socijalne zaštite dnevnog zbrinjavanja djece s invaliditetom i djece ometene u razvoju. Federalno ministarstvo rada i socijalne politike je u saradnji sa UNICEF-om, pri realizaciji Programa za jačanje sistema socijalne zaštite i inkluzije za djecu (SPIS Program), pristupilo izradi Smjernica o djelovanju centara za pružanje usluga socijalne skrbi dnevnog zbrinjavanja djece s invaliditetom i djece ometene u razvoju u Federaciji Bosne i Hercegovine. Općina Tešanj je za potrebe Dnevnog boravka obezbijedila adekvatan prostor.

Tokom aprila 2016.godine potpisan je ugovor kojim „Dnevni boravak“ za djecu i omladinu sa posebnim potrebama prelazi u nadležnost Kantonalnog Centar za djecu i odrasle sa poteškoćama u razvoju, te je na ovaj način riješen i pravni status Centra, tj. kao poslovna jedinica Centar za djecu i odrasle osobe s posebnim potrebama u Tešnju u sastavu Javne ustanove „Centar za djecu i odrasle osobe s posebnim potrebama“ ZDK.

Centar za djecu i odrasle sa poteškoćama u razvoju sada se finansira iz budžeta ZE-DO Kantona i budžeta općine Tešanj, a JU CSR Tešanj i dalje ima komunikaciju i saradnju sa Centrom (upućivanje djece, regulisanje određenih prava, i sl.).

Od 2011. godine Općina Tešanj za implementaciju projekta na godišnjem nivou kroz grant sredstva Budžeta općine izdvajala je po 20.000 KM (120.000 KM zbirno). U 2016.godini je izdvojeno do sada sredstava iz Budžeta 29.833,10 KM.

U finansiranju Javne ustanove „Centar za djecu i odrasle osobe s posebnim potrebama“ ZDK, učešće svake općine/Grada, za usluge ranog podsticanja razvoja i rane intervencije za djecu s posebnim potrebama predškolskog uzrasta, se kalkulišu prema broju stanovnika općine/Grada u odnosu na ukupan broj stanovnika Zeničko-dobojskog kantona, te obaveza Općine Tešanj po Ugovoru od 01.02.2016 godine iznosi mjesečno 1.239,84 KM ( ukupan iznos na godišnjem nivou je 14.877,96 KM). U finansiranju rada poslovne jedinice Centar za djecu i odrasle osobe s posebnim potrebama u Tešnju u sastavu Javne ustanove „Centar za djecu i odrasle osobe s posebnim potrebama“ ZDK, obaveza Općine Tešanj po Ugovoru od 28.03.2016 godine iznosi mjesečno 2.186,76 KM ( ukupan iznos na godišnjem nivou je 26.241,20 KM).

Dodatni vid podrške socijalnoj zaštiti direktno putem organa uprave je: sanacija i adaptacija stambenih prostora socijalno ugroženih lica, jednokratne materijalne pomoći putem organa uprave, sredstva za podjelu robnih paketa najugroženijim licima, pomoć licima zahvaćenim poplavama, te sredstva za povratak i angažovanje nezaposlenih lica (“Grantovi socijalne zaštite i pomoći” Budžeta Općine Tešanj za 2016. godinu, iznose 317.000 KM).

Socijalnu zaštitu na području općine Tešanj provode različita udruženja građana, što daje veliki doprinos za podizanje kvaliteta življenja naših građana.

Dodatni vid podrške socijalnoj zaštiti koji se ostvaruje putem udruženja: Organizacija porodica šehida i poginulih boraca redovno vrši obilazak bolesnih članova i njihovih porodica, Organizacija ratnih vojnih invalida obilazi članove na kućnom i bolničkom liječenju i pruža finansijsku pomoć najugroženijim članovima, UABNOR Tešanj ukazuje pomoć bolesnim članovima u nabavci lijekova,

kao i novčane pomoći najugroženijim, JOB Unija veterana rješava socijalno-statusne probleme članstva, UG invalida rada općine Tešanj obilazi bolesne članove koji su u teškoj materijalnoj situaciji, učestvuje u brojnim humanitarnim akcijama, UG „Održiv povratak“ Tešanj rješavaju povratničke probleme (iniciraju pomoć, vrše izbor korisnika svih vidova pomoći, sačinjavaju spiskove), najveći dio dotacije od Općine se dijeli kroz jednokratne pomoći za liječenje, pomoć u sahrani i drugo, Crveni križ realizuje pomoć dobrovoljnim davaocima krvi, prikupljaju pomoć za bolesne i dr, Crveni polumjesec pomoć najugroženijim starim licima i pomoć za liječenje teško oboljelih osoba, NHU Oslonac djelatnost je usmjerena isključivo u stambeno zbrinjavanje socijalno ugroženih lica koja nemaju riješeno stambeno pitanje niti mogućnost da ga samostalno riješe zbog nepostojanja prihoda, ili iz drugih razloga, UG Penzionera pruža pomoć za kupovinu lijekova i posmrtnine, jednokratne novčane pomoći, nabavka uglja za članstvo i dr.

Udruženje NHU „Oslonac“ svojim djelovanjem doprinosi rješavanju stambenog zbrinjavanja najugroženijih kategorija stanovništva.

Informacijom o radu i poslovanju udruženja građana na području općine Tešanj za 2016.godinu detaljno će biti obuhvaćeni i izvještaji o radu Udruženja od posebnog interesa (određena Odlukom o proglašenju udruženja od posebnog interesa, „Službeni glasnik općine Tešanj“ br: 9/06 i Odlukom o raspodjeli novčanih sredstava udruženjima od posebnog značaja za općinu Tešanj, broj: 02-14-7-97/15, novčana sredstva na stavci “Grantovi udruženjima od posebnog značaja za općinu Tešanj“ Budžeta Općine Tešanj za 2016. godinu iznos 82.000,00 KM).

Općinskom vijeću na usvajanje predlažemo slijedeći zaključak:

**1. Prima se na znanje Informacija o socijalnoj zaštiti na području općine Tešanj - položaj građana u socijalnoj potrebi i položaj djece i omladine sa posebnim potrebama u 2016. godini.**

Prilog: Informacija o socijalnoj zaštiti na području općine Tešanj (položaj građana u socijalnoj potrebi, djeci i omladini sa posebnim potrebama) JU Centar za socijalni rad Tešanj.

**OBRADIVAČ**

Služba za društvene djelatnosti  
i investicije

**Azra Muslija, dipl. pravnik**

**PREDLAGAČ**

OPĆINSKI NAČELNIK

**Mr.sci. Suad Huskić**